

ANABI ELISA



The history of the prophet Elisha in Illo Busa as recorded in the books of the prophets: 2 Kings 2:19 25-, 4:1 – 6:7.

Kiano Takada Piade

Elisa yādonadona kaakuno

Bīi pì deno ò Elisane: Gwa deke! Wá bīi katena maa lapo n èba. A imina ba nnao, a tɔɔte dí peke keo. Akū à ò: À wisi ka ta dufuū à mɔdomɛa. Akū wà mɔdone. À gèe gbɛ'i kīa, akū à wisi pì kàū à ò: Deke ò akū í pì kò è. Í pì da mɔ kū gagana kó tɔɔte pekekesaido dɔo. Akū í pì maa kù ee gbāa lapo Elisa òba.

Pɔ Elisa bò gū, ada ge Beteli. Gɔɔ pɔ à be zeū, akū nɔgɔn keno bùte bīiū, an a kè pɔnɔpɔnɔ an òne: Migbaa, n ge! Migbaa, n ge! À lɛte à wɛpɛmmá, à laalikènné kū Deke tɔdo. Akū nɔbɔ pāsīno bùte likpɛū men pia, an ne gbɛn bapia kū piado pino yàkayaka. Pɔ Elisa bò gū, à gèe Kaameli, akū à sùka à tà Samalia.

Gyaano nisi tuu yā

Anabino gāa gbɛke na wikipè Elisawa à ò: Ma zǎ pɔ de n gbɛ ũ gà. Ní dɔ pɔ n gbɛ pì Deke vīa vī. A fīade dá mɔ ma nenɔgɔn gbɛn piano setɛdi a zɔno ũ. Akū Elisa òne: Bó n yidi mà kennei? Bó n vī n kpui? À ò: Maakū n zɔbenna, nisi pɔ ku tuuū gū baasio maba peke vīo. Akū Elisa ò: Bo gāalewa, ndí ta giino lala n gbɛdakenɔwa piki, i ke yōnkōnndo, ndí gē kpu n kpɛle ta á gīnale kū n nenodo, ndí nisi ka ta pinɔū, ta pɔ pà ndi di kpado.

Akū nɔgbɛ pì fɛte à bò a kīa, à gèe ada ke maka. À gèe kpu kū a nenodo à kpɛle tà, andá ta dɔne, akū ada nisi kakaū. Pɔ ta pino

pà piki, à ò a ne done à ta dɔ, akū à òne ta ba ku dɔo, akū nisi pì zè kyu. À gèe à ò Lua gbě pine, akū Lua gbě pì ò: Ge n nisi pì yia, ndí fiabodo, mɔkɔn kū n nenɔdo í pɔbe kū a kɔɔ pɔ gɔ̃do.

Elisa Sunemu nɔgbě ne vūna

Zĩkezĩ Elisa gèe Sunemu. Nɔgbě tɔde ke ku gū, à à kàka à pɔbe a bewa, akū à gèe à bè. Zaa gɔɔ bee tó ada gète gū, ì lite à pɔbe gū. Akū nɔgbě tɔde pì ò a zāne: Má dɔ pɔ gbě pɔ ì gē la mɔɔmɔɔ pì Lua gbě sīandee. Wà kpé fīna dɔ wá kpé musu, wí wutebɔ dine gū kū tebulido kū guudo kū fitiado. Tó à mò wá gwadi, àdi pita gū.

Zĩkezĩ pɔ Elisa mò gū, à pìta a kpé piũ, à wutenaũ. Akū à ò a zĩkenna Geazine. Sunemu nɔgbě pì sisi. Pɔ à a sisi, akū à mò à zè Elisa ee. Akū Elisa ò Geazine: One à dēe kà à pɔ dino kèwēa piki. Bó à yidi wà keakūne sīi? À yidi wà akū yā'o kia kó zĩkannano dɔn'eedene ya? Akū nɔgbě pì ò: Ma kuna ma ɔũu peke dá kīsāmao. Pɔ nɔgbě pì bò, akū Elisa ò: Bó wá kenei? Akū Geazi wène à ò: Aba nenɔgɔna vīo, mí a zǎ zikũ. Akū Elisa ò: N̄ a sisi. Pɔ à a sisi, akū à mò à zè kpelewa. Akū Elisa òne: Ziki makaa'i nda nenɔgɔna kpa n kuawa. Akū nɔgbě pì ò: Aai Lua gbě ma deke, su n̄ eke to maakū n zɔbennaneo.

Akū nɔgbě pì nɔsì. Pɔ wě sù, à ne'ì nɔgɔna ũ lapɔ Elisa òneba. Ne pì gbāakũ. Zĩkezĩ à gèe a mae lè bua pɔkekennano kĩa. Akū à ò a mae pine: Ma mì! Ma mì! Akū a mae pì ò a zĩkennane: Ne pì se n̄ tado a dane. Pɔ à a sè à tado a dane, akū a da pì a sè à dà a gbala. Pɔ isātē kà midanguaũ, akū à gà. À dèdèdo Lua gbě pì kpu,

à a wùte a wutebɔwa, akū à bò à kpele tàle. À a zǎ sisi, akū à òne: Zíkennano do gbɛɛmea kū faagado. Má yidi mà ge Lua gbě pì kĩa kpaaka. Maa su tia. Akū à a là à ò: Bɔyādi nıda ge a kĩa gbāai? Ì ke mo dufu kó kāmabogɔɔ zīn gbāao. Akū nɔgbě pì ò: Yāke ba kuo. À kafu dī faagane à dèdewa, akū à ò a zíkennane: Ñ a lé kū wà ge. Su ñ zeo, seto ma ònne. An dà zeũ an gèe Lua gbě pì kĩa Kaameli gbesĩsĩ musu. Pɔ Lua gbě pì a è zāu, à ò a zíkenna Geazine: Sunemu nɔgbě gwa, ada mo zaa le! Basi ñ ge ñ dale, ndí a la, tó a aafia kū a zādo kū a nedo. Akū nɔgbě pì wène à ò: Aafia! Pɔ à kà Lua gbě pì kĩa gbesĩsĩ pì musu, akū à a kũ a gbanɔwa. Pɔ Geazi mò ɔkpadidi, akū Lua gbě pì ò: Ñ a to gũ. A nese yɔkpà, akū Deke ùtemea, i a yā omeao. Akū nɔgbě pì ò: Ma deke, ma nenɔgõna lamma ya? Mi o su ñ ma laakai fetemeao de?

Akū Elisa ò Geazine: Ñ n uta kakaa ñ kũ. Ma gopanna se ñ basi. Tó n kpakĩ kũ gbēkedo, su ñ fɔɔkpawao. Tó gbēke fɔɔkpamma sɔ, su ñ wenɛo. Ge ñ ma gopanna pì di ne pì ɔũwa. Akū ne pì da ò: Kũ Deke kunado kũ n kunado maa ta n saio. Akū à bò à tèdi. Geazi gènné ɛ à gèe à gopanna pì dī ne pì ɔũwa, esɔ i kɔfĩ keo, i yāke keo. Akū Geazi sùka à gèe à dà Elisale, à òne: Ne pì di vūo. Pɔ Elisa kà kpé pì kĩa, à ne pì è wutena a wutebɔwa gè ũ. Akū à gè à kpele tà, à wobikè Dekewa. Akū à wùte ne piwa. À lepè a lewa, à wepè a weũ, à ɔdàda a ɔnɔũ, à kua dìwa ee a mebaasi gèe à wāa kũ. Elisa fètewa, ada ta'o kpé piũ, à ge le à su la, akū à sùka à kua dī ne piwa do. Akū ne pì nisā gēn soopia à a wé gò. Akū Elisa Geazi sisi à òne: Sunemu nɔgbě pì sisi. Pɔ à mò, akū Elisa

òne: Ñ n ne se. À gè à kùte a gbá see à wùtene, akū à a ne pì sè à bòdo.

Anabino gãa pɔbena yã

Elisa tà Giligali. Gɔɔ bee legūsai kà b̀usu piũ. Anabino kakaana a ɛɛ, akū à ò a zĩkenna pine: Oo zĩkĩ di tewa. Dò kuku anabi pinɔne. Pɔ an gbẽke gèe dò pɔnɔ wetedi bua, akū à b̀obo sē pɔ è. À a ne b̀obo à kà a uta pà. Pɔ à sùdo, akū wà pàapaa wà kà dòũ, gbẽke ba dĩ lapɔ a deo. Pɔ wà do pì dà gbẽ pinɔne an pɔbedo, pɔ an ike, an wikipè an ò: Lua gbẽ, ga ku oo piũ. Akū andi fĩ an bèò. Akū Elisa ò: À buloditi se à m̀odo. Akū à dà à kà oo piũ à ò: Dänné an be. Akū pɔ vãi pì làka oo piũ.

Gbẽke b̀ò Baali Salisa à m̀ò Lua gbẽ pine kũ bulodi pɔ wà kè kũ pɔwen kaakudo men bao kũ kologoi dufudo. Akū Elisa ò: Kpa gbẽ pinɔwa an so. Akū a zĩkenna a là à ò: Gbẽ pinɔ gbẽn basɔɔe, laba maa bee kpaatennéi? À wène à ò: Kpammá an so, zaapɔ Deke ò an so, a kɔɔ dí suka à gɔ. Akū à kpàatenné an sò a kɔɔ gè lapɔ Deke òba.

Naama aafialena kũ a kusukedo

Naama mí Sulia kia zĩkannano gën'ɛede ũ. A bæena vĩ a dekenɛ mí tɔdeɛ, zaapɔ a sabadi Deke tò Suliano zĩbè. Nɔgɔnae zĩkanaũ, akū kusu gyã a lè. Gɔɔ pɔ Sulia zĩkan gbãamɔnnedeno gèe Isila'ila busuũ yãa, an nenɔkɔn ke kũ, akū à gè Naama na zĩkenna ũ. Akū nenɔkɔna pì ò a dekenɛ: Tó n zǎ gèe anabi pɔ ku Samalia kĩa dé, anabi pì da a gba aafia kũ a kusukedo. Akū Naama

gèe kia kĩa à ò: Nenɔkɔna pɔ bò Isila'ila busuũ ò diba diba. Akũ Suliano kia ò: Fete n̄ ge. Maa la kē Isila'ilano kiane. Akũ Naama suluba nākāa kilo oaa do kũ basoopiado kũ zīnalido kilo baakōkwi kũ utadanodo men kwi. À gèe kũ takada pɔ kia kē Isila'ilano kiane pido dɔ. Takada piũ kia ò: Ma takada di kpāzānne kũ ma zɔbenna Naamado, pɔ n̄ to a aafia le kũ a kusukedo. Pɔ Isila'ilano kia takada pì kalatukè, à a utada gà à kē à ò: Luan ma ũ pɔ mà to gbē ga kó mà to gbē kũ aafia ya? Bɔyādi à gbē pì gbèema mà a gba aafia kũ a kusukedoi? À gwa à gwa dé, ada ma le we fa!

Pɔ Lua gbē Elisa mà Isila'ilano kia a utada gà à kē, à lekpele kène à ò: Bɔyādi n n utada gà n kēi? To gbē pì mɔ ma kĩa, ìkũ dɔ pɔ anabi ku Isila'ila busuũ. Akũ Naama gè a sōgoũ, à gèe à zè Elisa kpé kpelewa. Akũ Elisa gbē zīwa à ò: Ge n̄ n gīna pipi Uudē iũ gēn soopia, n mebaasi i suka a gbeũ wasawasa. Akũ Naama pɔ pà, ada tá à ò: Máda e àa bo a kpu à mɔ à ze ma ee, i Deke a Lua tɔ si, i ɔ mamama, ma kusuke pì i laka ya? Damasaku swano Abana kũ Faapaado í maa de Isila'ila swano ilao de? Maa fɔ mà a gīna pipi gũ mà gɔ wasawasao de? Akũ à sùka kũ pɔpaado, ada tá.

Akũ a ibaanɔ nà a sɛɛ an ò: Baa, tó anabi pì yā zĩĩ dànne yāa, nda keo de? Lapɔ à ònne n̄ n gīna pipi iũ, ndi gɔ wasawasa, bee mí da n fu ya? Akũ à gèe à a gīna pìpi Uudē iũ ee gēn soopia lapɔ Lua gbē pì òneba. Akũ a mebaasi sùka a gbeũ wasawasa landɔ ausuba. Akũ Naama kũ a ibaanodo sùka an gèe Lua gbē pì kĩa an piki, à zè a ee à ò: Má dɔ sà pɔ deke ke ba ku guke ānuaño, sema Isila'ila busuũ baasio. Gba pɔ maakũ n zɔbenna ma mɔdo di si.

Akū Elisa ò: Kū Deke pɔ mi zīkenɛ kunado maa sio. Naama nàkewa à si, baa kū beedo à gì sidi. Akū Naama ò: Tó ni sio, maakū n zɔbenna n ma gba zé mà bùsu se faaga aso pia, zaapɔ maa sa'o deke kewa dɔo, sema Deke. Deke suu kemado kū yā dido. Tó ma kia gè kutedi Limɔne a kpu mí ma gɛe a kpadi, tó ma kutedo Limɔ kpé piū, Deke dí suu kemado kū yā pido. Akū Elisa ònɛ: Ka be aafia!

Pɔ à dà zɛū, à ta'ò yōnkōn, akū Lua gbě Elisa pì zīkenna Geazi laasookè à ò: Ma deke tò Sulia gbě Naama pì dá tá pā, i pɔ pɔ à mɔdone sio. Kū Deke kunado maa petedi mà peke siwa. Akū Geazi pète Naamadi. Pɔ Naama è a tɛ an kpɛ kū basido, akū à bò a sōgoū, ada a dá. Pɔ à kà, akū Naama a là à ò: Aafia de? À wène à ò: Aafia. Ma deke mí ma zīmma, à ò anabino gāa ausu gbēn pia kenɔ mí bò Efelaimumɔ buino bùsu gu sīsīdeū an mɔ akū kīa tia. N an gba suluba kilo bapia kū utadado mɛn pia. Akū Naama ò: Suluva kilo basiikō si. À nàkewa à kàne bɔkɔū mɛn pia kū utadado mɛn pia. À kpà a ibaa gbēn pianɔwa, akū an sè an gè ɛɛ Geazine. Pɔ an kà Elisa be sīsī musu, akū Geazi pɔ pinɔ sìmmá à kàte a kpu, akū à gbě pinɔ gbèe an tà. Pɔ à gèe à zè a deke Elisa kīa, akū Elisa pì a là à ò: Geazi, má n gɛɛi? À wène à ò: Maakū n zɔbenna, mi ge gukeo. Akū Elisa ònɛ: Pɔ nɔgōna pì bò a sōgoū, ada n dá, mba dō ma nina kundo gūo de? Suluva kó utadano sinammá gɔɔn dio, kó kù kpenɔ kó inabi bunɔ kó sãnɔ kó zunɔ kó nɔgōna kū nɔgbě zīkennanɔdo. Naama kusu gyā da gōnne kū n buinodo ee gɔɔkepiki. Pɔ à bò Elisa kīa, akū kusu gyā pì lila puu landō bu'uba.

Moko wé funa ila

Anabino gãa gbêke ò Elisane: Gu pɔ wì kɔ kakaando gwa, à kèwěa fĩũ. Wà ge Uudẽ, wá baapiki dí za paa, wí wá kɔkakaakpe dɔ gũ. Akũ Elisa ò: À ge. Akũ an gbêke ò: Nda gewadoo de? À wènɛ à ò: Maa ge. Akũ an gèɛ kɔa. Pɔ an kà Uudẽ, andá li zɔzɔ. Pɔ an gbêke dá za zɔ, akũ a moko wé wò à zù iũ putuũ, akũ à wikipè Elisadi à ò: O'o deke, ma moko pì aukɛɛ fa! Akũ Lua gbẽ pì ò: Má mí à zù susui? Pɔ à ɔ dònɛ, akũ Elisa li zɔ à zù ite gũ, akũ moko wé pì fù. Elisa ò: Sɛ! Akũ gbẽ pì ɔbò à sè.